

劉兆祐博士主編
中國史學叢書三編

皇明寶訓
(四)

臺灣學生書局 印行

大明宣宗章皇帝實訓卷之四

光祿大夫柱國少傅兼太子太傅禮部尚書武英殿大學士臣呂本謹校

南京禮部祠祭清吏司郎中臣陳淦

南京兵部職方清吏司主事臣朱錦謹閱

南京工部虞衡清吏司郎中臣呂胤昌

備荒

○洪熙元年六月乙卯無為州奏州民艱食已給預備倉糧濟之

上諭行在戶部尚書夏原吉等曰預備食儲正為百姓比之前代常平最為良法若處處收積完備雖有水旱災傷百姓可無饑窘此

太祖皇帝良法美意卿宜編行天下申明舊典務存實惠
勿事虛文

○丙辰河南新安知縣陶鎔奏民甚艱公私無儲獨函關
驛頗有儲糧欲申明待報然後給濟然民命危在旦夕
已先借糧一千七百二十八石給民候秋成還官

上謂尚書夏原吉曰知縣所行良善朕聞近年有司不體
人情苟有饑荒必須申報展轉勘實賑濟失時知縣急
於濟人先給後聞是能稱任使卿母拘文法責其專擅
○宣德三年四月辛未戶科給事中宋徵言洪武中郡縣
所糴預備倉糧近皆廢弛宜下郡縣修倉徵收以備荒
歉

上謂行在戶部臣曰此

太祖皇帝備荒良策當百世行之今廢弛如此皆有司之過宜卽遣官巡視整理有慢令及欺弊者皆罪之

恤災異

○宣德元年六月戊子河南布政司奏安陽臨漳二縣蝗上謂尚書夏原吉等曰近者有司數言蝗蝻此亦可憂姚崇捕蝗終不為災但患捕之不早耳卿宜遣人馳驛分督有司巡視但遇蝗生須早撲滅毋遺民患

○宣德二年八月戊辰

上謂尚書蹇義夏原吉等曰近者各處有司多奏水旱而山西郡縣旱尤甚若禾稼不成其民何所仰給朕心惻

卷思所以弭災之道卿等當輔朕不逮以回天意若今大雨民猶有望原吉對曰齊景公言善榮或為之退舍陛下憂民如此

天心悅鑒必有以副

聖意顧臣等不職實切惶愧皆頓首謝

○十二月丁丑

上謂行在戶部尚書夏原等曰今年陝西亢旱秋田無收其軍屯子粒民間秋糧俱已蠲免比聞軍民之中多因缺食流離豈可不恤其令有司開倉賑濟仍於南京運絹五萬匹綿布十萬匹令隆平侯等用心拯救勿令失所
○宣德三年四月丙寅山西解州潞州奏天旱民饑多流

移他境者

上覽奏惻然謂尚書夏原吉曰比聞山西久不雨朕心不安今果奏至其卽遣人賑濟且撫綏其民無令失所又曰聞旱災之地頗濶弭災之要修省在朕卿亦當敬謹勉盡乃職

○六月癸巳

上諭行在戶部臣曰霖雨久不止水潦泛溢今城中薪芻湧貴凡有運載入城者悉免抽分違者罪之

○七月丙辰順天河間真定保定等府及南直隸和州等州縣各奏苦雨山水泛漲渰沒田稼

上召六部尚書蹇義等以奏示之諭之曰天降災祥在德

朕覽之凜然卿等皆當勉思恤民之道

○八月戊申

上巡邊駐驛三河縣縣官朝見

上諭之曰善撫百姓今年此處水潦為灾宜以實聞當圖優卹之母妄有科擾朝廷授汝撫字之寄民不失所斯汝能盡職否則有罰

○宣德四年九月丁巳山西萬泉縣丞王琦奏去年少雨耕種無收今春至夏亦旱民多艱食

上以奏示戶部太子太師郭資進曰山西他郡縣未有奏旱饑者當遣官察視

上曰旱潦之灾天用儆朕有司所言勿用致疑卽量免其

租稅仍令有司善撫卹之

○宣德五年四月甲午易州奏蝗蝻生

上謂右都御史顧佐曰今禾苗方生宿麥漸茂而蝗蝻為灾若不早捕民食無望卽選賢能御史往督有司發民併力撲捕初發撲之則易若稍緩之卽為害不細

○六月己卯永平等衛及河間府靜海等縣奏蝗蝻生尚書郭敦請遣官往捕

上從之曰遣官之際亦須戒飭頗聞往年朝廷遣人督捕蝗者貪酷害人不減於蝗卿等須知此弊是日晚出御製捕蝗詩示敦等曰蝗之在患此詩備矣卿遣人往捕當如救焚拯溺不可緩也

○宣德九年十二月庚申直隸揚州湖廣四川各府州縣俱奏旱乾疾疫人民流亡

上聞之惻然謂尚書胡濙等曰上天降灾非水則旱加以疾疫民何以堪朕深憂懼卿等當勉圖匡濟有可以回天意拯民命者其悉以聞

抑祥瑞

○洪熙元年八月丁卯朔魯王肇輝遣長史進瑞粟尚書呂震以為豐稔之應請上表賀

上曰近日畿內州縣屢奏水潦卿不聞乎朕方夙夜憂民艱食若以此為瑞則山東一隅之民可當之如他處何其止勿賀王所遣長史賚之遣還

宣德七年五月甲戌行在禮部尚書浚以山西進龍馬駒請偕群臣上表賀

上曰二三年間水旱告灾繼踵而來朕方日夕惕勵一獸之異何救民饑而欲表賀其止之

○宣德八年閏八月辛亥蘇門答刺及諸番國來朝貢麒麟象馬諸物

上受之行在禮部尚書胡濙以麒麟瑞物率羣臣稱賀上曰遠方之物朕非有愛但念其盡誠遠來故受之不足賀也

武備

○洪熙元年九月壬子

上諭行在兵部尚書張本曰兵以禦侮當國家無事時正須整肅士伍修舉兵政書曰張皇六師詰爾戎兵正此之謂今內外衛所軍士徒具名數比遣御史給事中點閱多有逃亡者爾職典兵事宜卽遣人追捕庶幾士伍不缺

○宣德元年正月丁巳太師英國公張輔言在松操備官軍凡緣邊諸衛及陝西等都司皆已遣還合於河南等都司及直隸睢陽諸衛選調至京以時校閱

上曰然天下雖安不可忘武今國家無事正須訓兵練將卿等當為朕留意

○七月丁未

上罷朝退御左順門行在兵部尚書張本等侍語及軍衛
上曰昔

皇祖嘗言元末之時管軍武臣多務貪縱軍政不修隊伍
廢缺人問士卒安在則撫夾袋曰皆在於此蓋惟有其
名耳所以馴至大壞今得無復踵此弊乎宜嚴謹飭令
監察御史按察司官以時點閱不可急急

○十二月乙亥

上閒暇與學士楊溥語及治兵之道傳曰兵貴乎訓練有
方撫養得宜不患其不為用

上曰然養之厚則得其心練之精則得其用必其氣銳志
果而後可用若素不訓練一旦驅之矢石之間進退失

措何望有濟溥曰誠如

聖諭

○宣德二年正月癸卯

上諭行在兵部尚書張本曰各處衛所官旗不能撫恤軍士多致逃亡舊例皆有降罰朕寬待之限一年之內勾補不完然後加罪卿宜用心考核如舊不完必須降罰古人云威克厥愛允濟若更因循則軍政必至廢弛不可不用意

○宣德四年八月辛卯有獻兵書者

上因與侍臣論用兵

上曰古之用兵者卿等試言其一二侍臣對曰昔趙括少

學兵自以天下莫能當及為將以四十萬衆敗於秦此不知合變曹操得孫武之術及其破荊州乃驅北方之人遠涉江湖以八十萬衆敗於吳此驕之過諸葛孔明知古陳法以為足以取天下然相持數年魏人不敢決戰而孔明亦不能成功用古法誠難矣

上曰霍去病不學孫吳而伐匈奴功嘗居多由是觀之用兵制勝方畧存乎人又不在拘古法也

上又曰兵法世稱孫武止於疆霸曹操亦終不能取吳蜀所謂桓文之節制不能敵湯武之仁義者是也

馬政

○宣德二年十一月甲辰北京太僕寺官奏請遣官閱孳

生馬

上諭之曰馬畜於民間必寬民力而後可責成効國家立法固有定規其孳生不及數者亦屢下令免償未嘗以馬傷人蓋農民終歲動動以營衣食又有償馬之費甚可憫也爾等但率舊典以示勸懲民有貧難者宜寬恤之

○宣德五年三月癸卯

上閱馬命武士調習之顧謂侍臣曰軍國之政馬為先務今孽虜固當懷之以恩亦不可不示以威古人云事事乃其有備肆朕於馬政尤所用心侍臣對曰今馬蕃息視祖宗時加數倍矣

上曰此皆

祖宗之澤但朕遵用成法不敢少怠耳

備邊

○洪熙元年八月乙亥遼東都司奏廣寧等十八衛修理衣甲請支綿布三萬四千餘匹行在工部尚書吳中請給其半

上曰邊軍守禦須仗甲兵彼衛身無甲則膽氣衰何以責其禦敵若甲仗堅利紀律嚴明士氣自振足以懾服寇戎修甲何可惜費其卽與之

○九月壬子陝西都司奏擬造鐵盔青甲萬副所用物料乞令布政司支官鈔買辦

上從之謂行在工部尚書吳中曰邊防國家重事其切用